

МЕСЯЦА ЯНВАРЯ В 27 ДЕНЬ.

**ПРЕНЕСЕНИЕ МОЩЕЙ ИЖЕ ВО СВЯТЫХ ОТЦА НАШЕГО ИОАННА
ЗЛОТОУСТА.**

ВЕЧЕРНЯ.

Блажен муж: первый антифон. На Господи воззвах,

стихиры на 8, глас 4.

Подобен: Яко добля:

Златокованную трубу, / Богодохновенный орган, / догматов пучину неисчерпаемую, / церковное утверждение, / ум небесный, премудрости глубину, / чашу всезлатую, / изливающую реки учений медоточных и напаяющую тварь, / песненно воспоем.

Звезду незаходимую, / зарями просвещающую учений всю подсолнечную, / покаяния проповедателя, / губу всезлатую, мокроту лютаго отчаяния / изъемлющую и орошающую сердца, / истаявшая грехи, / Иоанна достойно златословесного почествим.

Земный Ангел и Небесный человек, / ластовица благоглаголива и многогласна, / добродетелей сокровище, / камень нерасседный, верных воображение, / мучеником подобен, равностоятель святых Ангелов, / апостолов единокорный, / в песнях да возвеличится Златоуст.

Ины стихиры, глас тойже.

Подобен: Званный свыше:

Священнейшее составим ликование: / венец бо златозрачный Церкви Христовы / на славу царску днесь от Коман / ко граду приходит царствующему, / светит, сияя свыше в возвращении своем, / к Царствию Невещественному верных вводит и всех присвоет Царю. / Темже вопием: златоименне отче, / Божественный Златоусте всезлатый, / умоли спасти и просветити души наша.

Яко небо светлое церковное, / запад, о Златоусте! / заточение подъял еси суровейшее, / возсияваеши ныне, радуясь, твари незаходимое, / грееши, украшаеми чудес звездами, мудре, / носиши Христа, пресветлеюща солнца образом, / просвещающаго ныне твое возвращение. / Темже вопием: светозарнейший светослове, / Златоусте всеумудре, / моли спасти и просветити души наша.

Ныне Небо со Ангелы ликует, / с тварию веселятся человечестии собори, / иже бо на земли, / небомысленныя показуя вся лестницею Божественною честных глагол своих, / сей к горе возшествием Богошественных степеней, / яко Иаков новый, / показывает Ангелов Божественных, / радующихся о предложении его. / Тем вопием: всеблаженне, / невещественных ангелов собеседниче Златослове, / моли спастися душам нашим.

Слава, глас тойже. Самогласен. Космы веститора.

Не подобаше тебе, Златоусте, / царский град оставившу, / жити в Команех, отонудуже Богом приведенное / царское всечреждение паки ты возврати в царский град. / Возвеселися же и Церковь, видевши ты, / исповедающихся и глаголющих: / величит слава моя Господа, / отдавшего ми невестовождя и утверждение веры, / приятие достоинств моих / и воспокой моих скраний, / высоту смиренномудрия и глубину милостыни, / и широту моей нищеты, / и долготу покаяния. / Темже молим ты, преподобне отче, / мир испроси и велию милость душам нашим.

И ныне, Богородичен:

Иже Тебе ради богоотец пророк Давид / песненно о Тебе провозгласи, / величия тебе Сотворшему: / предста Царица одесную Тебе. / Ты бо Матерь, Ходатаицу живота показа, / без отца из Тебе вочеловечится Благоволивый Бог: / да Свой паки обновит образ, истлевший страстьми, / и заблуждшее горохищное обрет овча, / на рамо восприим, к Отцу принесет, / и Своему хотению, с Небесными соединит Силами, / и спасет, Богородице, мир, / Христос имеяй велию и богатую милость.

Вход. Прокимен дне. И чтения три.

На стиховне стихиры, глас 5.

Подобен: Радуйся:

Радуется Церковь Христова, / на свещник священный взираючи, / ты, светильника светоносного, / егоже низложивше врази, / под спудом молчания скрыша, / почивает на горе ты добродетелей, / отче преподобне, / яко Божественное сияние, / вселенныя концы паче солнца облистающа чудесы. / Днесь недароприятный Божий суд показывает правду / с высоты твою, яко полудне пресветлое, / и подавает сущим в мире / мир и велию милость.

Стих: Уста моя возглаголют премудрость, и поучение сердца моего разум.

Мира пшеницемеритель, вернии, / иже сладостию Небеснаго Духа сердца напитая всех, / не из Египта происходит: / Иосиф же новый проявляясь, / в честных мощех от Коман приходит, / лютых бурю и пучину / днесь печалей отсекая молитвами. / Сего убо ублажим и верою возопиим: / прииди блаженне, / посреде совершающих память твою, / тем спасение подавая богатно и велию милость.

Стих: Уста праведнаго поучатся премудрости, и язык его возглаголет суд.

Точит, яко мвроположница красная, / чудес Божественнаго мвра, Златоусте, / рака твоя миру, / и врачеваний струями души благоухает чествующих ты, / Христовыми благодатьми, / яко невестественными ароматы, обогатил еси, / благовоние же даруеши присноживущее верою притекающим. / Темже, наслаждающися благодатей твоих, премудре, / и пречистых и Божественных напитавшися мощей твоих, / верно просим душам нашим дати велию милость.

Слава, глас 6.

Преподобне треблаженне, / святейший отче, / пастырю добрый и
Началопастыря Христа учениче, / положивый душу за овцы: / ты и ныне,
всехвальне Иоанне Златоусте, / проси молитвами твоими / даровати нам велию
милость.

И ныне, Богородичен:

Богородице, Ты еси лоза истинная, / возрастившая нам Плод живота, / Тебе
молимся: молися, Владычице, / со святыми апостолы, / помиловати души наша.

Тропарь, глас 8.

Уст твоих, якоже светлость огня, возсиявши благодать, вселенную просвети: /
не сребролюбия мірови сокровища сниска, / высоту нам смиренномудрия показа. /
Но твоими словесы наказуя, отче Иоанне Златоусте, / моли Слова Христа Бога
спастися душам нашим.

Богородичен:

Иже нас ради Рождейся от Девы, / и распятие претерпев, Благий, /
испровергий смертью смерть, и Воскресение явлей, яко Бог, / не презри, яже
создал еси рукою Твоею, / яви человеколюбие Твое, Милостиве, / прими
Рождшую Тя Богородицу, молящуюся за ны, / и спаси, Спасе наш, люди
отчаянные.